



2. Radunanza cumünela dals 22.6.2016 a las 20.00 in sela polivalenta S-chanf

Presidi: Duri Campell

Actuar: Duri Schwenninger

Preschaints: Preschaints sun 46 votantas e votants

Büro electorel: Linard Luzi, Steivan Luzi e Roman Parli

Tractandas:

1. Protocol da la radunanza dals 27.04.2016
2. Participaziun a la "Engiadina San Murezzan Turissem SA" (ESTM SA) auncha da funder ed autorisaziun da der ün mandat da prestaziun a la ESTM SA auncha da funder a partir dals 1. schner 2018
3. Revisiun parziela da la ledscha davart l'economisaziun da las immundizchas, artichel 30bis, survagliaunza cun indrizs da video
4. Contrat da servitut cun las Ouvras Electricas Engiadina OEE per las parcelas nr. 601, 753, 489, 419, 474, 372, 296, 651, 242, 227 e 215
5. Varia

La glista da tractandas vain approveda sainza objecziuns.

Protocol: Il protocol da la radunanza cumünela dals 27.04.2016 vain approvu cun granda magiurited e sainza cuntravusch.

7 8.300 Turissem e cura
Participaziun a la "Engiadina San Murezzan Turissem SA" (ESTM SA) auncha da funder ed autorisaziun da der ün mandat da prestaziun a la ESTM SA auncha da funder a partir dals 1. schner 2018

Il president fo ün'introducziun e spiega, cha'ls 31.12.2017 conclüda dimena il circol d'Engiadin'Ota scu purteder da l'organisaziun turistica e cotres eir la „Ledscha davart l'organisaziun turistica Engiadina San Murezzan“. In quist lö stu gnir manzuno, cha tal turissem as tratta que da l'economia primara in nossa regiun. Circa 1/3 da las plazzas da lavur illa regiun pertuocha directamaing l'hotellaria, que es 6 voutas dapü cu la media svizra. L'importanza dal ram economic as muossa eir illa granda spessezza da las plazzas da lavur. Uschè pertuocha in nossa regiun 80 plazzas da lavur sün 100 abitants (calculo sün basa da plazzas cumplainas), que es significantamaing dapü cu la valor media da la Svizra, 46 plazzas da lavur sün 100 abitants. Que muossa cleramaing, ch'ün turissem ferm es la basa per quasi mincha piazza da lavur in nossa regiun.

Causa la grand'importanza dal turissem per l'inter territori haun las vschinaunchas da l'Engiadina'Öta e da la Val Bergiaglia elavuro ün concept chi cumpiglia novs purteders per cha quist'incumbenza importanta possa gnir accumulada efficiaintamaing a partir dals 1. schner 2018. Ad es logic e chapibel cha la populaziun po (e stu) s'exprimer scu prüma davart l'avegnir dal turissem. Que ho nempe consequenzas directas sün las ulteriuras incumbenzas, cha's stu auncha regler danövmaing. Da ster aint pel turissem fuorma il terrain, sül quël paun crescer las soluziuns per las ulteriuras incumbenzas, causa cha quistas staun in ün connex direct cun l'orientaziun turistica da la regiun.

Tres l'adattaziun da la clef da repartiziun vegnan redottas considerabelmaing las differenzas traunter las vschinaunchas in que chi riguarda ils cuosts per persuna ed an, que accentuescha eir la ferma dependenza cumünai vla dal sector turistic. Ils cuosts per la commercialisaziun turistica s'amuntan in media a duos francs per di ed abitant – taunt dess valair per nus noss'economia primara! Zieva avoir preschanto auncha cifras instinctivas e zieva animada discussiun decida la radunanza cun 31 cunter 6 vuschs e 4 abstenziuns, da's parteciper a la "Engiadina San Murezzan Turissem SA" (ESTM SA) auncha da funder ed autorisaziun da der ün mandat da prestaziun a la ESTM SA auncha da funder a partir dals 1. schner 2018. Our dal ravuogl vain fatta la proposta, da ponderer da funder üna cumischion chi s'occupa in avegnir dal turissem. Il president piglia incunter quella proposta.

8 7.200 Allontanamaint da las immundizchas
Revisiun parziela da la ledscha davart l'economisaziun da las
immundizchas, artichel 30bis, survagliaunza cun indrizs da video

Il president fo ün'introducziun e spiega, cha a S-chanf, Cinuos-chel e Chapella regna üna noscha disciplina tar l'allontanamaint d'immundizchas. Differentas imsüras nun haun displaschaivelmaing mno üngüns resultats positivs. Uschè s'ho decis darcho da prümvaira da pussibiliter a la populaziun d'allontaner immundizchas specielas gratuitamaing per impedir inavaunt ün dischuorden tals deposits d'immundizchas tar la Staziun S-chanf ed in Plaun Grand a Cinuos-chel. Quell'imsüra nun ho purto ünguotta. A vain deposito inavaunt immundizchas specielas e dafatta bütto quellas illas pressas da chartun cun la consequenza, cha quellas vegnan dannagedas, scha vain bütto ogets dürs scu laina ed oter pü. Adüna dapü vegnan bütto sachs nairs i'ls „Moloks“ e differentas personas alluntaneschan immundizchas liber sainza sachs i'ls „Moloks“. La noscha disciplina d'allontaner immundizchas chaschuna cuosts immens per nossa vschinauncha. Our da quel motiv ho la supranza decis da munter in ün prüm pass i'ls lös critics cameras da video per survaglier ils deposits. Per pudair fer quel pass, fo que dabsögn d'üna basa leghela. D'üna vart üna ledscha approveda da la radunanza cumünela, da l'otra vart ün reglamaint chi garantescha l'anonimied da mincha persuna. In ün prüm pass es gnieu elavureda üna revisiun parziela da la ledscha davart l'economisaziun da las immundizchas da l'an 2013. Our dal ravuogl vain fat attent regard il ramassamaint da lavadüras in otras vschinaunchas. Zieva cuorta discussiun decida la radunanza cun 33 cunter 7 vuschs e 5 abstenziuns d'accepter la revisiun parziela da la ledscha d'immundizchas, giavüscha però, chi vain pruvo d'infurmer aunch'üna vouta a la populaziun aunz scu installer las cameras.

9 0.209 Contrats e cunvegns
Contrat da servitut cun las Ouvres Electricas Engiadina OEE per
las parcelas nr. 601, 753, 489, 419, 474, 372, 296, 651, 242, 227 e
215

Il depüto fo ün'introducziun e spiega, cha la lingia existenta d'ota tensiun traunter Pradella e La Punt spordscha üna strettezza illa rait da transport Svizra ed Europeica. Quella strettezza difficultescha eir il transport da l'energia da forz'idraulica in Grischun. Our da quel motiv voul la Swissgrid rinfurzer e schlarger tres our la lingia. Il rinfurzamaint da la lingia existenta da 380-kV es ün proget da rait fich important e part da la rait strategica 2025, cha la Swissgrid po sgürer la furniziun in Svizra ed in Europa considerabelmaing. Il

schlargiamaint da la lingia existenta porta eir l'avantag, cha l'Engiadina ho üna sgürezza impü, scha sturess cruder our la producziun d'electricited in nossa regiun. Scu imsüras ecologicas pel schlargiamaint da la lingia d'ota tensiun e per garantir il transport d'energia da l'implaunt idraulic Ova Spin, vegn demuntada la lingia libra existenta da 220-kV traunter Pradella e Zuoz e rimplazzada cun üna lingia suotterrauna. Per quist intent staun las OEE stipuler culs proprietaris da terrain in tuot 643 contrats da servitut. Zieva paun gnir demuntadas las ca. 1'000 pütts da lain, chi schligerischan l'ambiant scu eir l'aspet dal lö. Sül territori cumünel da S-chanf passa la nouva lingia suotterrauna tres las parcelas nr. 601, 753, 489, 419, 474, 372, 296, 651, 242, 227 e 215 da Punt'Ota fin tal cunfin da la vschinauncha da Zuoz. Tenor contrat da concessiun da l'an 1958, art. 5, es nossa vschinauncha oblida da conceder drets da passagi gratuits. Ils lös, inua cha la nouva lingia traversa las lingias cumünelas existentas, cumpiglian ils contrats ün'alinea chi prevezza, cha cuosts chi vegnan chaschunos impü pervi da la lingia da las OEE vaun plainamaing a charg da las Ouvras Electricas. Zieva chi sun gnidas dedas tuot las spiegaziuns decida la radunanza cun granda magiurited e sainza cuntravusch da conceder ils drets da passagi e cun que d'accepter ils contrats da servitut.

10 9.999 Varia

Il president do cuntschaint las datas regard las tschernas cumünelas. Fin ils 30.09.2016 haun tuot ils commembers d'ün'autorited cumünela chi voutan sortir sün la fin dal trienni, da comunicher la demischiun in scrit a la suprastanza cumünela. Ils 5 october 2016 ho lö üna radunanza da nominaziun. Fin ils 7 october po minchün candider per üna carica. In dumengia, ils 30 october haun lö las tschernas a l'urna, prüm scrutin.

Our dal ravuogl vain fat attent, cha'l trenin gira intuorn cun reclamas d'üna regiun tagliauna. Il president spiega, cha quel saja gnieu acquisto d'ün di a l'oter per rimplazzer il trenin defect.

Our dal ravuogl vain fat la dumanda regard il stedi dal nouv implaunt da tir. Il president spiega, cha fin la fin da l'an 2016 gnaro suottamiss a la radunanza üna dumanda da credit.

Il president serra la radunanza a las 22.00 ed ingrazcha a tuot ils preschaints per lur cumparsa.

In buna fè

Il president:

L'actuar:

D. Campell

D. Schwenninger